

Ni balüü Jesucrist loj San Juan

¹ Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gag-bee reeman conin ma zidyob gac. Abi' Jesucrist guxhaal xianjlaman din gulüüman ni guin ree lon, naj Waj xbejn Jesucrist, bén cayüjn laaman sirv.

² Abi' canin ni diidxli xcwent xtiidx Dios, xcwent Jesucrist në xcwent gra ree ni baguijan.

³ Xiquilbaa ree bén ni rool, në ree bén rucaagdi-ajg në ree bén ridxga' ni ca loj gui'ch guie ni rugojn xcwent ree ni gac, din ma zidyob gac reen.

Rxhiaal San Juan gui'ch loj guigajdx ree yadoo

⁴ Naj Waj cucan gui'ch guie par läjt najdi xbejn Cristo, läjt bén nabán ree loj guigajdx ree xguiedx Asia. Dux Dad ree Dios, bén gui't bén naj Dios diizd gocli në yan, në guigajdx ree sprijt za' lod canabeeman, në Jesucrist, laa reeman güünle' läjt yabe'cdxe tée reeman luxdoodi. ⁵ Jesucrist been gra ni naj güünman, laa tée man goc bén yaloj baban loj ree bengüt abi' laaman rniabee gra ree bén rniabee loj guidxliuj. Laaman rën dunuj ree abi' con xrejnman basiaman dux tol ree ⁶ abi' beenman dunuj ree zi'c bén rniabee, been tée man dunuj ree bixhioz rüjn sirv xDadaman Dios. Zeel Jesucrist rayalaman respejt në guialrniabee zianczi. Amén.

⁷ ¡Gol gogbee guial gui'taman loj zaj! Gra ree bejn guguiaa laaman xt ree bén ni guliiz lans cwë'lénman, abi' gra ree bénguidxliuj goon da't chi

Ni balüü Jesucrist loj San Juan 1:8 ii Ni balüü Jesucrist loj San Juan 1:15

guguaa reeman laaman. Laan naj diidxli. Zian gac.

⁸ Dux Dad ree Dios bén rajp gra guialrniabee. Laaman gui't, laaman naj Dios diizd guia'xchej, nē yan, laaman rēb por laagajcaman: “Naj naj zi'c lejtr A con Z, lejtr ni rzuloj nē ni rlioxnē alfabeto, naj ca' gra guialrniabee.”

Baguiaa San Juan xguialrniabee Cristo

⁹ Naj Waj tijb ree lasa'di bén rliladx Jesucrist. Ti-jbzi nadxu' ree loj xguialrniabeeman, tijbzi cayza-agdiaj ree abi' caydaan ree por laaman. Naj guyu'n ladxguiib loj yuj riga' loj nijsdoo lod la Patmos guial rtiechan xtiidx Dios nē gra ree ni ragbeen xcwent Jesucrist. ¹⁰ Chi yu'n ladxguiib loj yuj riga' loj nijsdoo guin, guyu tijb dumingw chi guza'can zi'c bén rnie'xhchaal por xguialrniabee xSprijt Dios, abi' xichan biguiejnan zi'c cha' trompejt abi' biguien rejs da't cha' tijb ¹¹bén ni rēb:

—Naj naj zi'c lejtr A con Z, lejtr ni rzuloj nē ni rlioxnē alfabeto, din tijbzi naj naj bén rniabee. Bacaña loj gui'ch gra ni cuguaal dxel guix-hiaalil gui'ch guin loj guigajdx cwaa ree da bejnan bén zojb ree niz Asia, luguiedx Éfeso, Esmirna, Pérgamo, Tiatira, Sardis, Filadelfia nē Laodicea.

¹² Dxel chi badxi' lon par guguián chunin rnieenē naj dxel baguián gajdx ree candeler or.

¹³ Abi' galay ree candeler guin baguián tijb ni naj zi'c tijb bejn, najcwaman tijb lajd yool xt guia'man, abi' naxii tijb cinch or luxdooman.

¹⁴ Naquichbēj guijcaman zi'c naj guidxlad xiil, zi'c naj guiajnayaag naquich naj guidxgуйcаман abi' zi'c bajl re'criani guiaalojman. ¹⁵ Abi' guia'man

Ni balüü Jesucrist loj San Juan 1:16 iii Ni balüü Jesucrist loj San Juan 2:2

rdiinan bacha' zi'c guiib ni la bronce chi yu'n loj
guij, abi' cha'man naj rejs zi'c rüjn nijs naquie'
chi rguiajtan. ¹⁶ Guiáad yaaman ladbee ca'man
gajdx bajl xanyabaa. Abi' ro'man ririi tijb Espad ni
nadoxh da't grop lad, guiáad lojman rulaa bacha'
zi'c chi rusni gubijdx gojl da't.

¹⁷ Dxel chi baguian laaman biajban guia'man
zi'c bengüt. Per laaman guxhoob yaa ladbeeman
guican, naman:

—Ad rdxbil, naj naj bén rniabee diizd
guia'xchej abi' par tiblayaa. ¹⁸ Ma güjtan, per
yan ma babanan, abi' ma nabanan tiblayaa, abi'
naj rniabee guialgüjt né gabijl. ¹⁹ Yan bacaa ni ma
baguiaal né ni cuguaal né ni qui gacri. ²⁰ Ni né
rën guiëb guigajdx ree bajl xanyabaa ni baguiaal
yan ladbee, né guigajdx ree candeler or. Guigajdx
ree bajl xanyabaa guin rën guiëban gajdx ree bén
rniabee guigajdx cwaa ree da bejnan niz Asia, abi'
guigajdx candeler or guin rën guiëban guigajdx
cwaa ree da bejnan.

2

Diidx par ree bén Éfeso

¹ Yan bacaa ni guixhaalil loj bén rniabee ree da
bejnan luguiedx Éfeso. Bacaa: “Bén ni ziza galay
ree candeler or, bén ni ca' gajdx ree bajl xanyabaa
con yaa ladbeeman, laaman na lojdi: ² Naj ragbee
xhie cayüjndi. Naj ragbee xhie tarbajw cadéididi,
ragbee téeñ guial ad ralenya'tidi. Naj ragbee guial
ad rdaantidi bén mal ree, abi' ma beendi prueb
bén na ree naj xi apóstoles Jesucrist majsi achut
naj reeman abi' ma gogbeedi guial ganax diidx

Ni balüü Jesucrist loj San Juan 2:3 iv Ni balüü Jesucrist loj San Juan 2:11

rusquiee rniecee reeman. ³ Naj ragbee guial raj-pidi pacens abi' ma guzagdiajdi guial rëndi naj sin guial yalena'ydi. ⁴ Per yu' ni ad ruladxtan rüjndi: guial ad rëntridi naj zi'c guia'xchej. ⁵ Gol basaaladx xhienaaag guyëndi naj guia'xchej guial zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gax-halan casti par lëjt abi' ad zajctridi biani par los demazri ree bejn, bal id zayüjndi xgab. ⁶ Per yu' ni cayüjndi zi'c rayal, guial rdxe'chidi ni rüjn ree ben nicolaítas, zi'cgajc rdxe'chan por ni rüjn reeman. ⁷ Bén rën ree gucaagdiajg, gol bacaagdiajg ni rniecee xSprijt Dios par ree da bejnan: Bén ni güün gan loj dol, naj gudë ni gawaman ni rtia loj yag ni runee guialnaban ni zojb xanyabaa lod zojb Dios.”

Diidx par ree bén Esmirna

⁸ Yan bacaa ni guixhiaalil loj bén ni rniabee ree da bejnan luguidex Esmirna. Bacaa: “Bén rniabee diizd guia'xchej në par tiblayaa, bén ni güt abi' babanman stijb, laaman na lojdi: ⁹ Naj ragbee xhienaaag cadëdidi tarbajw por ni rüjn bejn lëjt, ragbee tœen loj guialprob ni nabandi majsí diidxli najdi benrijcw guial ma zinalidi xtiidx Dios, abi' ragbeen xhienaaag rnieeguijdx bejn lëjt, bén ni na ree naj reeman bén Israel xbejn Dios majsí laa reeman naj xbejn xindxab. ¹⁰ Ad rdxebtidi guialzi ni tëdidi din xindxab güünx gan din cu' ree bejn tio'p choondi ladxguiib par guiguien guial diidxli zinalidi xnejz Dios. Chii dxej tëdidi guialzi guin ree, per gol guzujdxi'ch xt dxej guiëtidi, abi' naj yazaladx lëjt guialnaban tiblayaa. ¹¹ Bén rën ree gucaagdiajg gol bacaagdiajg ni na xSprijt Dios par

Ni balüü Jesucrist loj San Juan 2:12 v Ni balüü Jesucrist loj San Juan 2:18

ree da bejnan: Bén güün gan loj dol, achetri güün guialgüjt ni rarojp laaman.”

Diidx par ree bén Pérgamo

¹² 'Yan bacaa ni guixhiaalil loj bén rniabee ree da bejnan luguiedx Pérgamo. Bacaa: “Bén ca' espad ni nadoxh grop lad ro', laaman na lojdi: ¹³ Naj ragbee guial luguiedx zojbidi xindxab rniabee ni. Per majsi zian läjt za'dxi'chidi con naj ad rucwëëzt rliladxidi naj ni'qui lën ree dxej ni bagüjt reeman Antipas, tijb ree xcompiaridi bén ad bacwëëzt bililadx naj, bén bagüjt reeman ladxidi lod rniabee xindxab. ¹⁴ Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bén ad rusa'nt ni basiid Balaam bejn ree, bén rëb loj Balac xhienaaq guzaalguiwaman bén Israel ree din gaw reeman guialraw ni ma gurej loj ree xdiros Balac guin, né par been reeman graloj ree nidxuudx con ree bén ad najt lacheel reeman. ¹⁵ Stijb ni ad ruladxtan naj guial lojdi no'ch ree bén ad rucwëëzt rüjn zi'c rüjn ree bén nicolaítas. ¹⁶ Zeel gol bayüjn xgab por ni rüjndi, bal id züjndi zian nayob gaxhalan casti din günan guialgxutis con laa reeman con espad ni ririi ro'n. ¹⁷ Bén rën ree gucaagdiajg, gol bacaagdiajg ni na xSprijt Dios par ree da bejnan: Bén rüjn gan loj dol, naj gudë mana gawaman, guialraw xanyabaa ni ad nünbeet ree bejn. Gudë téen tijb guiaj naquichdoo lod ca laj cübaman ni achutczi ragbee, tijbzí bén tia' guiaj guin gagbee.”

Diidx par ree bén Tiatira

¹⁸ 'Yan bacaa ni guixhiaalil loj bén rniabee ree da bejnan luguiedx Tiatira. Bacaa: “Xi'n Dios, bén

Ni balüü Jesucrist loj San Juan 2:19 vi Ni balüü Jesucrist loj San Juan 2:27

re'criani guiaaloj zi'c bajl, bén rdiin bacha' guia' zi'c guiib ni la bronce, laaman na lojdi: ¹⁹ Naj ragbee ni cayüjndi, ragbeen xhienaaag rëndi naj, xhienaaag rliladxidi naj, xhie cayüjndi por naj abi' ad ralenya'tidi. Naj ragbee guial mazri zagdxe cayüjndi yan guial loj guia'xchej, ²⁰ Per yu' ni ad ruladxtan cayüjndi: Rdaandi Jezabel, bengunaa ni na rudëed xtiidx Dios. Abi' rtiëjbidi rulüuman da bejn reen dxel ruzaalguiwaman laa reeman rüjn reeman ni dxuudx ree con ree bén ad najt lacheel reeman, abi' raw reeman guialraw ni ma gurej loj ree xdiros ree benguidxliuj. ²¹ Ma badën tiamp din yayüjnman xgab, din gusa'n xguialdxuudxaman, per ad rëntaman. ²² Zeel yan gaxhalan guialguidx par laaman, gaaman gagxuuman. Abi' bén rüjn ree zi'c rüjnman, bal id reeman guchaa mod ni nabán reeman ziangajc zro' naj guialzi ni téd reeman, ²³ gugüjtan gra ree bén ma been xgab guiban zi'c nabán bengunaa guin. Zian gagbee ree da bejnan guial naj ragbee xhie yu' guijc bejn xhie tée yu' luxdooman, xhie xgab rüjnman. Naj gune läjt ni rayalidi bal gonin rüjndi. ²⁴ Par gra ree da bejnan bén zojb ree luguiidx Tiatira, läjt bén ad zinalt ree zi'c rusiid Jezabel guin bejn ree, läjt guial na reeman ad ragbeetidi xt ni bigra xcwent xindxab guial ad ridxga'tidi laa reeman, achetri ni ganin lojdi, ²⁵ tijbzni ni rnin lojdi: Gol guzujdxi'ch loj ni ma ragbeedi xt chi guialan stijb. ²⁶ Bén güün gan loj dol, abi' gusnuu güünman zi'c rënan guidib tiamp ni guibanman, naj gudë guialrniabee lojman din nabeeman loj ree nacion. ²⁷ Nabeeman loj ree nacion guin zi'c tijb bén ni ca' tijb var guiib,

Ni balüü Jesucrist loj San Juan 2:28 vii Ni balüü Jesucrist loj San Juan 3:6

zi'czi rlia' bejn tijb guiajs zian güünnëman bén ni ad rënt ree guzoob diidx. Gudën guialrniabee guin lojman zi'c banee da Dadanan lon, ²⁸ gudë tœen lojman bajl xanyabaa ni rliejn rsildoo. ²⁹ Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

3

Diidx par ree bén Sardis

¹ 'Yan bacaa ni guixhiaalil loj bén rniabee ree da bejnan luguiedx Sardis. Bacaa: “Bén naban con guigajdx ree xSprijt Dios abi' ca'man gajdx bajl xanyabaa, laaman na lojdi: Naj ragbee gra ni cayüßndi ragbee tœen guial ma güjtidi, mäjsi par ree bejn nabandi. ² Zeel gol batie'ch xbacaalidi, gol been naguiejn chitëë nit ni sta cayüßndi, din naj ruguijan guial ad cayüßntidi xnejz delant loj da Dadan Dios. ³ Gol basaaladx ni ma biguiejndi në ni ma basiididi, abi' gol been zian, gol bayüjn xgab zi'c ni cayüßndi. Din bal id zatie'ch xbacaalidi zi'c cayüßndi, dxel zi'c ri't tijb bëngubaan ziangajc chi gagbeedi ma bi't casti par lëjt. ⁴ Per luguiedx Sardis, yu' tio'p choon ree bejn sta naya, laa reeman naj bén gacw lajd naquich abi' sa reeman con naj, din rayal reeman laan. ⁵ Bén güün gan loj dol, chi guidxin hor, zian gacwaman lajd naquich abi' ad zuse'n tœétan lajman loj xlibr guialnaban. Abi' delant loj Dios në loj ree anjl guien guial laaman naj da bejnan. ⁶ Bén rën ree gucaagdiajg, gol bacaadiajg ni rëb xSprijt Dios par ree da bejnan.”

Diidx par ree bén Filadelfia

Ni balüü Jesucrist loj San Juan 3:7 viii Ni balüü Jesucrist loj San Juan 3:14

⁷ Yan bacaa ni guixhiaalil loj bén rniabee ree da bejnan luguiedx Filadelfia. Bacaa: “Bén naya nali, bén naj diidxli, bén rajp guialrniabee loj gra zi'c gojp rey Davi guialrniabee, tibzzi laaman rajp guialrniabee par guixhialaman tibz nejz ni achut zajc gusiaaw o gusiaawaman tibz nejz ni achut zajc guixhial, laaman na lojdi: ⁸ Naj ragbee gra ni cayüjndi. Gol gogbee guial maksi ad rajptidi guialrniabee, per naj ma guxhal tibz nejz din guiti'e chidi da diidxan sin guial chu gutëe lojdi, din zinalquidi da diidxan abi' ad goct rëbidi guial ad najtidi da bejnan. ⁹ Lëjt guguiaa ni günan con ree xbejn xindxab bén rëb ree naj reeman bén Israel xbejn Dios, abi' rusquieezi reeman. Guguiaadi ni günan laa reeman, guidgazuxib reeman lojdi, gagbee tée reeman xhienaaag rënan lëjt. ¹⁰ Abi' zi'c ma bazoobidi diidx gapidi pacens guial chinalidi da diidxan, ziangajc ganan lëjt chi guidxin dxej guil't guialzi loj guidib guidxliuj, zi'c tibz prueb par gra ree bénguidxliuj. ¹¹ Nayob guialan loj guidxliuj stibz. Gol guzujdxi'ch loj ni ma ragbeedi chiteé tia' ben ren ni rayalidi. ¹² Bén güün gan loj dol, naj gudë lojman tibz luar zojbloj lën yadoo zojb xanyabaa lod naban da Dadan Dios, ni guibaman tiblayaa. Dxel tiblajtaman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zojbaman. ¹³ Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

Diidx par ree bén Laodicea

¹⁴ Yan bacaa ni guixhiaalil loj bén rniabee ree da bejnan luguiedx Laodicea. Bacaa: “Bén ni rüjn

Ni balüü Jesucrist loj San Juan 3:15 ix Ni balüü Jesucrist loj San Juan 3:22

cumplid xtiidx, bén ni been gra ni rayal güünman, bén naj diidxli, bén rniabbeenë Dios diizd gocli chi gad guidxliuj gacchaaw, laaman na lojdi: ¹⁵ Naj ragbee gra ni cayüjndi. Ad najtidi zi'c nijs nayaag o zi'c nijs laa. ¡Balzianclaa tiblayaa niajquidi zi'c nijs nayaag o zi'c nijs laa! ¹⁶ Per läjt najdi zi'c nijs nayool, ni'qui nadxa' ni'quidza nayaagt, dxel zi'c laa rabëe gajc ro' bejn nijs nayool guin, zian ma rënán gabëladxan läjt. ¹⁷ Lëjt rëb guial najdi benrijcw, rajpidi gra abi' achet ryaadxidi. Per ad ragbeetidi guial achet rajpidi, najdi bénprob, bén zibëél, achet sirv läjt, najdi bénlutia'p niz lon guial ad nabantidi xnejz. ¹⁸ Zeel rnin lojdi, zi'c rzii bejn ganax or, zian gol been naguiejn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayüjn xgab din guiguie'ch xguialxtudi abi' guiguiendi naya delant lon. Në chi rzii bejn tijb rumed par guiaaloj bejn din guguaaman zagdxe, zian gol been naguiejn din gapidi da guial rignia'n din guguaadi zagdxe. ¹⁹ Rdilnë'n abi' ruzuxnejzan gra ree bén rënán. Zeel gol bagu' luxdoodi gol bayüjn tée xgab xhienaag nabandi. ²⁰ Gol gogbee guial naj cabedx läjt, zi'c chi rninee tijb bejn rulidx stijb bejn. Cabëësan chu guidxga' naj, zi'c chi rgu' bejn stijb bejn din gaw reeman tijbz. Abi' bén guidxga' naj ma nabannë'n laaman abi' laaman nabannëman naj. ²¹ Bén güün gan loj dol naj gudë cwë'n cweman lod canabeen, zi'cgajc naj chi gulox benan gan loj dol, gure cwë' da Dadan Dios lod canabeeman. ²² Bén rën ree gucaagdiajg, gol bacaagdiajg ni na xSprijt Dios par ree da bejnan."

4

Rlies reeman xvalor Díos xanyabaa

¹ Chi gulox bacan diidx guie ree, baguian niz ladia dxel baguian tijb port naxal xanyabaa. Abi' bén guneenë gajc naj diizd guia'xchej bén naj cha' zi'c trompejt, laaman na lon:

—Wé'p guie din gulün lüj ni gac ree chi ma gojc ree ni rnin lojl.

² Loj hor zii gajc por xguialrniabee xSprijt Dios, chi gogbeen ma za'n xanyabaa yagaj baguian tijb yagxhil zagdxe zi'c xi yagxhil tijb rey, lojn zojb tijb bejn. ³ Abi' bén zojb loj yagxhil guin rulaaman bacha' zi'c ree guiaj zagdxe ni lasajc wayëjx, ni la jaspe në cornalina. Abi' guijc yagxhil guin ca tijb guidguj ni rulaa bacha' zi'c guiaj zagdxe ni la esmeralda. ⁴ Abi' gadëd ro' yagxhil guin baguian zagajlbitap ree yagxhil zagdxe abi' loj ree yagxhil guin zojb ree gajlbitap ree bengol najcw reeman lajd naquich yu' coron or guijc reeman. ⁵ Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi r'bidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios. ⁶ Baguia tëën delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaaloj reeb. ⁷ Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj. ⁸ Tijb gaj ree be guin yu' xho'p xhiil reeb, abi' xijch xhiil reeb në lën xhiil

Ni balüü Jesucrist loj San Juan 4:9 xi Ni balüü Jesucrist loj San Juan 5:3

reeb yu' zien da't guiaaloj reeb. Abi' dxej guiaal
ad rucwëëzt rëb reeb:
Naya nalil, naya nalil naya nalil najl dux Dadan
Dios,
lüj guial ca'l gra guialrniabee,
lüj guial najl Dios diizd guia'xchej në yan abi'
gui'til.

⁹ Beegaj chi rlies ree be guin xvalor bén ni zojb
loj yagxhil guin, bén naban tiblayaa, beegaj ruza't
reeb laaman zagdxe rüdëed reeb quixtëë lojman,
¹⁰ guigajlbital ree bengol zojb yagaj, bazuxib ree-
man lojman, bén ni zojb loj yagxhil abi' naban-
man tiblayaa, abi' ruzuxib reeman lojman rüdxiiib
xcoron reeman niz lojman, rëbgaj reeman:
¹¹ Dux Dad ree Dios, lüj rayal guiya'p respejt,
diidxza'c në guialrniabee.
Din lüj beenchaaw gra ni yu'
abi' lüj rëb guial chu' gra ni yu',
abi' yu' reen.

5

Tijb gui'ch ni nadüüb con bén naj zi'c xi xiil Dios

¹ Dixel baguiian guial bén zojb loj yagxhil zagdxe
ni naj zi'c xyagxhil tijb rey, ca'man tijb gui'ch
yaaman ladbee. Gui'ch guin zi'c lojn zi'c xijchan
ca lejtr abi' nadüüban, abi' naguiidan con gajdx se
chitëë chu guixhial laan. ² Loj hor guin baguiian
tijb anjl bén gojl da't, rbiidxa'man rejs rëbaman:

—¿Chu rayal chiquied ree se guie abi' guixhial
loj gui'ch guie?

³ Per ni'qui xanyabaa, ni'qui loj guidxliuj, ni'qui
lën liuj ad bidxejlt bén ni rayal guixhial gui'ch
guin, ni'qui par guguaaman ni ca loj gui'ch guin.

Ni balüü Jesucrist loj San Juan 5:4 xii Ni balüü Jesucrist loj San Juan 5:9

⁴ Abi' naj däd binan chi baguian guial achut rdxejl guixhial loj gui'ch guin në par guguaaman ni ca loj gui'ch guin. ⁵ Dxel na tijb ree bengol guin lon:

—Ad roonl, baguiaa nial ma yu' tijb bén ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman bén naj zi'c tijb beedx loj xdiao Judá por guialniabee ni rajpaman, laaman za loj xdiao rey Davi.

⁶ Abi' chi baguian, dxel baguian guial galay lod za' yagxhil zagedxe ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb bén naj zi'c xi xil Dios rguien xsen lod bidxeelguijdxaman chi gütaman. Abi' yu' gajdx xcajchaman con gajdx guiaalojman, guigajdx guiaalojman naj guigajdx xSprijt Dios bén rxhiaalaman guidib guidxliuj. ⁷ Bibig bén naj zi'c xil guin cwa'man gui'ch guin ladxaa bén zojb loj yagxhil guin. ⁸ Chi cwa'man gui'ch guin, guidap ree be za' gajxh cwë' yagxhil guin në gra guigajlbitap ree bengol guin bazuxib reeman lojman. Tijb gaj ree bengol guin ca' reeman tijb gaj arp ca' tée reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios. ⁹ Bengol guin ree rool reeman tijb cant cüb ni rëb:

Lüj rayal tia' gui'ch guin
abi' guixhialil se ni naguiidnën.

Din lüj güjtil
abi' con xrejnl ni guxhie'l gudijxil
por graloj bejn din gac reeman xbejn Dios,
achet güünan xhietëëz diidx rniece reeman,

Ni balüü Jesucrist loj San Juan 5:10 xiii Ni balüü Jesucrist loj San Juan 5:14

o xhie loj diaa, o xhie guiedx o xhie nacion zëed
reeman.

¹⁰ Beenl laa reeman rey
been tëël laa reeman bixhioz par dux Dad ree
Dios,
abi' laa reeman nabee loj guidxliuj.

¹¹ Baguia tëën biguiejn tëën cha' zien ree anjl
gadëd ro' yagxhil zagdxe guin con guidap ree be
guin në ree bengol guin. Abi' bënguixiujczi naj
reeman por mil naj reeman. ¹² Abi' däd rejs rniece
reeman rëb reeman:

Bén naj zi'c xi xiil Dios, bén güt,
laaman rayal tia' guialrniabee,
laaman rayal gap guialnaza'c,
quiarguejn, në gojl,
respejt, guza't reeman laaman zagdxe,
guilies tëë reeman xvaloraman.

¹³ Dxel biguiejnan cha' gra ree ni been Dios, zi'c
ni yu' ree xanyabaa, loj guidxliuj në ni yu' ree lën
liuj në ree ni yu' loj nijsdoo, rëb reen:

Bén zojb loj xyagxhil guialrniabee në bén naj zi'c
xi xiilaman,
par laa reeman naj
respejt, diidxza'c, guialrniabee,
abi' guilies reeman xvalor reeman
zianczi në par tiblayaa.

¹⁴ Chi gulox rëb reen zian, dxel guidap ree be za'
yagaj rëb reeb:

—Amén.

Abi' guigajlbitap ree bengol za' yagaj bazuxib
par gap reeman laaman respejt, bén ni naban
zianczi në par tiblayaa.

6

Guigajdx ree se

¹ Dxel baguian biquied bén naj zi'c xi xiil Dios se yaloj guin, abi' zi'c chi rbiidxa' guziaaw zian biguiejnan gunee tijb ree be guin, rëbib:

—¡Guda!

² Dxel baguian gulentie tijb way naquich, abi' bén dxiib laab ca'man tijb xi arcw flejch. Abi' cwa'man tijb coron guial ma beenman gan, dxel briiman persi ziguieenman gan mazri.

³ Chi biquied bén naj zi'c xi xiil Dios se barojp guin biguiejnan rëb be barojp guin:

—¡Guda!

⁴ Dxel gulentie tijb way xnia, abi' bén dxiib laab ca'man tijb espad naroob në guialrniabee par gustijlaman bejn ree loj guidxliuj din gugüjt lasa' reeman.

⁵ Chi biquied bén naj zi'c xi xiil Dios se bayon, biguiejnan rëb be bayon guin:

—¡Guda!

Dxel baguian gulentie tijb way ya's, abi' bén dxiib laab ca'man tijb xijglibr. ⁶ Abi' galay guidap ree be guin biguiejnan cha' tijb bén rëb:

—Tib quil trigo lasajcan tib dxej dxiin abi' choon quil cebada lasajcan tibdexj dxiin, per ache güünl sejt në vin.

⁷ Chi biquied bén naj zi'c xi xiil Dios se badajp guin, biguiejnan rëb be badajp guin:

—¡Guda!

⁸ Dxel baguian gulentie tijb way naguiëch, abi' bén dxiib laab laman guialgüjt, abi' zinal gabijl laaman. Cwa' reeman guialrniabee par gugüjt reeman tib part loj tajp lala' ree bénguidxliuj. Yu'

Ni balüü Jesucrist loj San Juan 6:9 xv Ni balüü Jesucrist loj San Juan 6:16

reeman guiët por wadijl, o por guialrliaan, o por guialguijdx, o por ree be doxh yu' loj guidxliuj.

⁹ Chi biquied bén naj zi'c xi xiil Dios se bagaay guin, baguian xan altar za' ree xsprift ree bén bagüjt reeman guial bililadx reeman guzujdxi'ch tëë reeman loj xtiidx Dios. ¹⁰ Abi' rbidxa' reeman rejs rëb reeman:

—Dios, Dad bén rniabee, lüj naj bén naya nali abi' rüjnl zi'c rayal, ¿za plact gaglaal par güün xguialguxtisil con ree bén ni bagüjt dunujn loj guidxliuj din yaguijx reeman ni been reeman?

¹¹ Dixel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c güt reeman, bén ni cayüjn gajc ree sirv Dios.

¹² Chi baguian biquied bén naj zi'c xi xiil Dios se baxo'p guin, dxel guxu rejs da't abi' gubijdx gojcan nagas zi'c tijb lajd ya's. Guiáad bëew gojcan naxnia zi'c rejn, ¹³ abi' ree bajl xanyabaa biajb reen loj guidxliuj zi'c ryajb ree higo ni ya' loj yag higo chi rbi' bidoxh. ¹⁴ Dixel gunidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen. ¹⁵ Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c bén nado', në ree bén ad najt zi'c bén nado', gra reeman baquie'chloj lën guiajbiliaa në lën ree yalaj. ¹⁶ Abi' rëb reeman loj ree guia' në loj ree yalaj:

—Gol biajb du guijcan, gol baquie'ch tëë dunujn loj bén zojb loj xyagxhil guialrniabee në loj xcasti

Ni balüü Jesucrist loj San Juan 6:17 xvi Ni balüü Jesucrist loj San Juan 7:8

bén naj zi'c xi xiil Dios, ¹⁷ din ma bidxin dxej doxh ni gudëed reeman casti, abi', ¿chu zajc taan casti guin?

7

Tibgayuu tiuubitap mil ree bén Israel

¹ Chi gulox baguian ni guin ree, baguian tajp ree anjl za' reeman guidap xquin guidxliuj par gucwëëz reeman bi ni zëëd guidap xquin, chiteë guibi' bi loj guidxliuj, ni'qui loj nijsdoo, ni'qui ree loj yag. ² Dixel baguian stijb anjl zëëdaman niz lod rliejn gubijdx, ca'man xse Dios naban. Abi' däd rejs guneenëman guidap ree anjl guin, bén ni ca' ree guialrniabee par güün reeman ni güün reeman con guidxliuj në con nijsdoo, ³ rëbaman loj reeman:

—Ad xhie güündi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

⁴ Dixel biguiejnan bël reeman cwa se guin lucwaj. Por gra ree bén Israel, tibgayuutiubitap mil reeman cwa se guin lucwaj. ⁵ Din chiptio'p mil ree bén zëëd loj xdiaa Judá cwa se guin, në chiptio'p mil ree bén zëëd loj xdiaa Rubén në chiptio'p mil ree bén zëëd loj xdiaa Gad. ⁶ Në chiptio'p mil ree bén zëëd loj xdiaa Aser, në chiptio'p mil ree bén zëëd loj xdiaa Neftalí, në chiptio'p mil ree bén zëëd loj xdiaa Manasés, ⁷ con chiptio'p mil ree bén zëëd loj xdiaa Simeón, chiptio'p mil ree bén zëëd loj xdiaa Leví, në chiptio'p mil ree bén zëëd loj xdiaa Isacar, ⁸ chiptio'p mil ree bén zëëd loj xdiaa Zabulón, chiptio'p mil ree bén zëëd loj xdiaa José,

Ni balüü Jesucrist loj San Juan 7:9 xvii Ni balüü Jesucrist loj San Juan 7:14

chiptio'p mil ree bén zëéd loj xdiaa Benjamín cwa se guin lucwaj reeman.

bénguixiuj najcw lajd naquich

⁹ Dxel baguian bénguixiuj ree, per bénguixiuj ree ni'qui chut zajc gulab laa reeman, bén ni za ree gadxagayaa guiedx, gadxagayaa diaa, bén rniee ree gadxagayaa diidx bén za ree gra lad në gadxagayaa nacion. Za' reeman delant loj xyagxhil bénrniabee në delant loj bén naj zi'c xi xiilaman. Najcw reeman lajd naquich ca' tée reeman zijn.

¹⁰ Abi' rëb reeman rejs da't:

Dunujn raya'pan perdon por dux Dadan Dios
bén zojb loj xyagxhil guialrniabee
në por bén naj zi'c xi xiilaman.

¹¹ Abi' gadëd ro' yagxhil guin con guidap ree be ni za' yagaj con guigajlbitap ree bengol, gadëd yagaj za' gra ree anjl abi' bazuxib reeman delant loj xyagxhil Dios xt basajb guijc reeman liuj par gap reeman laaman respejt, ¹² rëb reeman:

¡Amén! guialrniabee, gojl,
guialrajc, respejt, diidxza'c,
guialrlies xvaloraman në quixtëë,
naj reen par dux Dad ree Dios zianczi në par
tiblayaa. Amén.

¹³ Loj hor zii tijb ree bengol guin gunabdiidx lon:
—¿Chu ree bén ni najcw lajd naquich guin, ban
tée ree bénan?

¹⁴ Bädxilnan rën:

—Ad ragbeetan Dad, lüj ragbee.

Dxel naman lon:

—Laa reeman naj bén guzagdiaj da't abi'
naquich xab reeman guial ma naya reeman ma
biquied xtol reeman con xrejn bén naj zi'c xi xiil

Ni balüü Jesucrist loj San Juan 7:15 xviii Ni balüü Jesucrist loj San Juan 8:5

Dios. ¹⁵ Zeel za' reeman delant xi yagxhil Dios, abi' dxej guiaal cayüjn reeman sirv lod zojbaman. Abi' bén zojb loj yagxhil guin ma za'man con laa reeman, abi' laaman gap laa reeman. ¹⁶ Ad yu'tri dxej guiliaan reeman, ad ze'c tëët reeman nijs, ad zudxüü tëët gubijdx laa reeman, ad zagnalaatëët reeman. ¹⁷ Din bén naj zi'c xi xiil Dios bén za' galay lod za' xi yagxhil Dios, laaman gap laa reeman zi'c tijb bén rajp ree xiil abi' chinëman laa reeman lod rajch nijs ni runee guialnaban. Dixel Dios laaman gutiaa loj reeman gra ree nijs brii loj reeman chi biin reeman.

8

Guigajdx se

¹ Chi biquied bén naj zi'c xi xiil Dios se ni goc gajdx guin, bayajcdxe xanyabaa cost garol hor. ² Dixel baguijan gajdx ree anjl za' reeman delant loj Dios, cwa' reeman gajdx trompejt. ³ Dixel bi't stijb anjl con tijb chaabacwi ni or, guzuliman delant lo altar guin abi' yu' bén badëëd zien yaal din cu'man goxyaal guin loj altar or ni za' delant loj yagxhil zagedxe ni naj zi'c xyagxhil tijb rey, din tijbzí chë'pnë goxyaal guin xtiidx gra ree xbejn Dios, diidx ni rniece reeman chi rbejdx rniab reeman laaman. ⁴ Dixel diizz ladxxaa anjl guin brii goxyaal guin con ree xtiidx ree xbejn Dios, diidx ni rniece reeman chi cabejdx canab reeman laaman, abi' wë'p reen niz loj Dios. ⁵ Dixel bacha anjl guin chaabacwi guin guij ni yu' loj altar guin abi' bazurlojman laan loj guidxliuj. Abi' däd rejs guridxa' guziaaw, gojc naquie', wë'p nijs, abi' bi't xudoxh.

Ni balüü Jesucrist loj San Juan 8:6 xix Ni balüü Jesucrist loj San Juan 8:13

Trompejt ree

6 Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

7 Chi bacwejdx anjl yaloj guin trompejt ni ca'man, biajb guiajyabaa loj guidxliuj no'chan bajl në rejn. Dxel cost gurrol guidxliuj we'c con ree yag në ree gui'xh naga' yu' lojn.

8 Chi bacwejdx anjl barojp guin trompejt ni ca'man, dxel zi'c naj guia'ro' ni cacaguij naj ni biajb loj nijsdoo, abi' cost garol nijsdoo bayajcan rejn loj hor guin. **9** Abi' cost garol ree be ni nabon loj nijsdoo güjt reeb abi' cost garol ree barcw ni yu' loj nijsdoo gunidloj.

10 Chi bacwejdx anjl bayon guin trompejt ni ca'man, dxel biajb bajl xanyabaa ni naroob ni cacaguij zi'c chi rtiaguij guied, loj cost garol guiw ni yu' në cost garol ree lod rajch nijs biajban. **11** Bajl xanyabaa ni biajb lan Ajenjo, abi' cost garol nijs guin ree gojc nala abi' däd zien ree bejn güjt guial bayajc ree nijs guin nala.

12 Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bëew në cost garol ree bajl xanyabaa bicajy. Abi' guial bicajy reen, dxel cost garol dxej në guiaal ad basnit.

13 La'tgaj cuguijan ni guin ree, biguiejnan zi'c chi rzuoj tijb bisia xanyabaa. Dxel biguiejnan cha' tijb anjl rbixdiajman rëbaman:

—;Prob, per prob, per probza ree bén ni yu' loj guidxliuj por zachoontrompejt ni ryaadx gucwejdx za choon ree anjl!

9

¹ Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan ro' bizë ni ad yu't lod rliox. ² Chi guxhalan ro' bizë guin tijb go'xh yo'xhchab brii lën bizëë guin zi'c chi ririi go'xh lën tijb horn naroob, xt bascajy go'xh guin gubijdx në bi. ³ Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb guialrnabee par gac reeb bedoxh zi'cgajc nixüb. ⁴ Per gunabee reeman laa reeb chitëë xhie güün reeb guixya' ree, ni'qui ree yag, ni'qui ree gui'xh naga'. Naabzi ree bén ni ad yu't ree xse Dios lucwaj. ⁵ Per ad par gugüjtt reeb bejn, naabzi par sagdijaj reeman gaay bëëw. Abi' lod ruditixa' reeb riyajnan zi'c ryajn lod ruditixa' nixüb. ⁶ Lën ree dxejzii quiil ree bejn guialgüjt, per ad zadxejlt reeman laan. Guiën reeman guiët reeman per ad zëjtt reeman.

⁷ Bi'tsu guin ree naj reeb zi'c naj ree way ni ma za' par che reeb loj wadijl, guijc reeb yu' zi'c coron or, abi' loj reeb naj zi'c loj bejn. ⁸ Abi' guidxgуйc reeb naj zi'c guidxgуйc béngunaa, guiaad dxidlay reeb naj zi'c dxidlay beedx. ⁹ Guidib luxdoo reeb nada'cwan zi'c guib, abi' xhiil reeb rüjnan naquie' zi'c rajc naquie' chi ruxüünnë ree way carrejt loj wadijl. ¹⁰ Abi' xbaan reeb naj zi'c xbaan ree nixüb, abi' con lupuntan ruditixa' reeb. Con xbaan reeb yu' reeb gojl par gusagdijaj reeb bejn ree loj gaay bëëw. ¹¹ Anjl ni rniabee bizë ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg

Ni balüü Jesucrist loj San Juan 9:12 xxi Ni balüü Jesucrist loj San Juan 9:21

laaman Apolión, diidx guin ree rën guiëb reen bén ruloox.

¹² Zian rliox guialzi yaloj, dxel gui't zatio'p guialzi.

¹³ Chi bacwejdx anjl baxo'p trompejt ni ca'man, dxel biguiejanan tijb cha' bejn briin galay ree cajch ni za' guidap xquin altar or ni za' delant loj Dios.
¹⁴ Cha' bén biguiejanan rëbaman loj anjl baxo'p bén ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

¹⁵ Zian bidxin or, bidxin dxej, bidxin bëëw në ijjz ni naj par laa guidap ree anjl guin din gugüjt reeman garol ree bënguidxliuj. ¹⁶ Abi' biguiejanan bël naj xsuldad reeman bén dxiib ree way. Naj reeman tio'pgayuu millon. ¹⁷ Ze baguian way guin ree con ree bén dxiib laa reeb: Bén dxiib ree way guin, guidib luxdoo reeman nada'cw guib culor xnia, ni sul në ni naguiéch. Abi' guijc ree way guin naj reen zi'c guijc ree beedx, abi' ro' reeb ririi bajl, go'xh në azufre. ¹⁸ Abi' garol ree bënguidxliuj güjt por bajl guin, go'xh guin në azufre guin ni ririi ro' reeb. ¹⁹ Con ro' ree way guin rugüjt reeb bejn ree, abi' con xbaan reeb rucheelguijdx reeb din lupunt xbaan reeb najn zi'c guijc bëël.

²⁰ Per los demasri ree bén ni ad gütt por ree guialzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajct ruguiaa, ad rajct riguiejn ad rajc tëët rza reeman. ²¹ Ad bacwëëz tëët rugüjt reeman bejn ree, ad basa'n tëët reeman guialbidxaa, ad basa'n tëët reeman ni dxuudx ni

Ni balüü Jesucrist loj San Juan 10:1 xxii Ni balüü Jesucrist loj San Juan 10:8

rüjn reeman con bén ad najt lacheel reeman, ad basa'n tëet reeman guialgubaan.

10

Tijb anjl ca' gui'ch

¹ Dxel baguian stijb anjl bén gojl da't, zidguajtamán xanyabaa lën tijb zaj abi' guijcaman dxiib tijb guidguj. Lojman naj zi'c gubijdx, abi' guia'man naj zi'c tio'p bajl ziool. ² Dxel ca'man tijb libradoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj. ³ Dxel guridxa'man rejs da't zi'c rbindxa' beedx, chi guridxa'man guridxa' gajdx ree guziaaw. ⁴ Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguejnan cha'tijb bén na lon diizd xanyabaa:

—Ad guaal ni gunee guigajdx ree guziaaw guin, din ad rayalt gagbee ree bejn laan.

⁵ Abi' anjl ni baguian za'li loj nijsdoo në loj guidxliuj gules yaa ladbeeman xanyabaa, ⁶ abi' badëë xtiidxaman por bén nabán tiblayaa, bén been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni rayal gac. ⁷ Din chi gucwejdx anjl ni goc gajdx trompejt ni ca'man dxel ma bidxin dxej gac zi'c naj xixgab Dios, zi'c bagojnman loj ree bén badëë xtiidx Dios loj ree bejn bén ni rüjn ree sirv lojman.

⁸ Dxel zatijb gaj gunee bén ni guneenë naj diizd xanyabaa, naman:

—Wej bica' librdo ni zojbyal loj ladxaa anjl ni za' loj nijsdoo në loj guidxliuj.

Ni balüü Jesucrist loj San Juan 10:9xxiiiNi balüü Jesucrist loj San Juan 11:6

⁹ Dxel wan lod za' anjl guin, rën lojman din
guneeman librdo guin lon, dxel naman lon:

—Cwa'n gudawan. Ro'l guiatan nejxh zi'c dxijn,
per lënl nala yaban.

¹⁰ Dxel cwa'n librdo guin ladxaa anjl guin, abi'
gudawanan. Ro'n biguiajtan nejxh zi'c dxijn,
per chi gulox gudawanan nala biguiajtan lënan.

¹¹ Dxel bagojn reeman naj guial gusnuu gugojnan
bejn ree ni na Dios gac con zien ree nacion, rey ree
në ree guiedx, xhietëëz diidx rniece reeman.

11

Tio'p ree testiw

¹ Abi' baneeman tijb var ni rtia'beenë bejn, na-
man lon:

—Bisu bica'bee xyadoo Dios në altar, dxel gu-
labil bén cayajp ree Dios respejt lën yadoo guin.

² Per ad tia'beel lule' yadoo guin din lule' guin ma
badëë Diosan loj ree bén ad najt ree bén Israel,
laa reeman naj bén gusagdajaj ree bén Jerusalén loj
choon ijj garol. ³ Abi' naj gaxhalan tio'p ree da
bejnan din guza't reeman naj. Grop reeman gacw
lajd ya's, abi' laa reeman guiniee da diidhan choon
ijz garol.

⁴ Grop ree bén guin naj grop ree yag olivo në
grop ree candeler ni za' loj dux Dad ree Dios bén
rniabee loj guidxliuj. ⁵ Bal chu bén rën güünnë laa
reeman xhienin, ro' reeman grii bajl din gugüjt
reeman bén rdxe'ch ree laa reeman. Zian guiët ree
bén rën güün laa reeman xhienin. ⁶ Grop ree bén
guin rajp reeman guialrniabee par gusiaaw ree-
man xanyabaa chitëë gal guia loj choon ijj garol

Ni balüü Jesucrist loj San Juan 11:7xxiv Ni balüü Jesucrist loj San Juan 11:13

guin chi guiniee reeman da diidxan. Rajp tëë reeman guialrniabee par guchaa reeman nijs gacan rejn, abi' zajc guiniab reeman din gui't graloj guialzi loj guidxliuj bëltëez volt rën reeman. ⁷ Per chi ma bayaaloj tiamp ni guiniee reeman da diidxan, dxel tijb monstruo, tijb be doxh grii lën bizë ni ad rlioxt, be guin ca'pnë laa reeman abi' güünb laa reeman gan abi' gugüjtib laa reeman. ⁸ Dxel gaa xcuerp reeman lunejz luguiedx Jerusalén lod güt xdad reeman Jesucrist loj crüjz, luguiedx ni naj yan zi'cgajc Sodoma në Egipto. ⁹ Dxel graloj ree bejn bén rniece ree gadxagayaa diidx, bén gralad ree, bén za graloj ree nacion zuguiaa reeman gaa xcuerp ree bén guin lunejz choon dxej garol, per ad zatiëjt reeman guigui'e ch ree bén guin. ¹⁰ Abi' ree bén nabán loj guidxliuj dád yabaa reeman guial ma güjt ree bén guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree bén guin laa reeman. ¹¹ Per chi ma bayaaloj choon dxej garol guin, yasban Dios bén guin ree dxel chixche reeman abi' gra ree bén guguiiaa dád guidxeb reeman. ¹² Dxel dád rejs biguien cha' tijb bén ni gunee xanyabaa, rëbaman loj grop ree bén guin:

—Gol wë'p guie.

Abi' wë'p reeman xanyabaa lën tijb zaj delant loj gra ree bén rdxe'ch laa reeman. ¹³ Hor ni bayë'p reeman xanyabaa bi't tijb xodoxh abi' zien ree ni bize'n luguiedx guin abi' gajdx mil bejn güjt. Guiáad gra ree bén ad güjtt dád bidxeb reeman abi' gules reeman xvalor Dios bén yu' xanyabaa.

Ni balüü Jesucrist loj San Juan 11:14xxv Ni balüü Jesucrist loj San Juan 11:19

¹⁴ Zian rliox guialzi rarojp, dxel laa zëëd gajc guialzi ni rayon.

Trompejt ni goc gajdx

¹⁵ Chi bacwejdx anjl ni goc gajdx guin trompejt ni ca'man, dxel rejs da't biguien cha' ree bejn xanyabaa rëb reeman:

Ma bidxin dxej yaya'n gra xguialrniabee guidxliuj loj dux Dad ree Dios
në loj Jesucrist abi' nabee reeman zianczi në tiblayaa.

¹⁶ Guigajlbitap ree bengol zojb loj xyagxhil reeman delant loj Dios, bazuxib reeman xt basajb loj reeman liuj gojp reeman laaman respejt, ¹⁷ rëb reeman:

Dux Dadan Dios, lüj rajp gra guialrniabee abi' najl Dios yan në diizd gocli abi' gui'til.
Quixtëe lüj guial ma culüü xguialrniabee naroobil ni rajpil

abi' ma guzulojl canabeel.

¹⁸ Bénguidxliuj ree bidxe'ch reeman, per ma bidxin dxej gulüü xguialrdxe'chil.
Ma bidxin dxej güün xguialguxtisil con ree bengüt par gudëél ni rayal tia' ree xbejnl
bén badëëd ree xtiidxil, në ree bén bililadx lüj.
Në ree bén rajp lüj respejt.

Ma bidxin dxej zi'c ree benzojbloj në ree bén ad zojblojt tia' reeman ni rayal reeman, dxel gunidlojl bén ruxhiin ree loj guidxliuj.

¹⁹ Chi gulox rëb reeman zian, bixal xyadoo Dios xanyabaa dxel biguien xcaj promejs ni been Dios diizd gocli. Dxel guzuloj rë'p nijs, rajc naquie',

Ni balüü Jesucrist loj San Juan 12:1xxvi Ni balüü Jesucrist loj San Juan 12:9

rëëz guziaaw, bi't xudo'xh abi' dák zro' biajb guia-jyabaa.

12

Tijb béngunaa né tijb dragon

¹ Dxel gojc tijb sen ro' xanyabaa. Balüüloj tijb béngunaa nadüübaman gubijdx, abi' nuzuj guia'man loj bëëw abi' guijcaman yu' coron ni gocchaaw con chiptio'p bajl xanyabaa. ² Yu' xi'n béngunaa guin abi' rbixdiajman ragnaa lënman guial ma gal xi'nman. ³ Per gojc stijb sen xanyabaa. Balüüloj tijb dragon ro', tijb bedoxh najb culor xnia. Yu' gajdx guijquib, chii xca-jchib yu' tëë tijb coron tijb gaj guijquib. ⁴ Abi' con xbaanb bazaalib cost garol bajl xanyabaa loj guidxliuj. Dxel guzujb loj béngunaa guin din gawib xi'nman naabzi galix. ⁵ Gojl xi'n béngunaa guin tijb xindo niguiaaw, abi' laax nabee loj guidxliuj con tijb var guuib. Dxel biquied reeman laax loj xni-aax, bidinxn lod zojb Dios lod canabeeman. ⁶ Abi' béngunaa guin baxüünman par niz lod naj ganax yujbidx, lod ma beenchaaw Dios par laaman, lod gudëëd reeman ni gawaman choon ijz garol.

⁷ Dxel guyu wadijl xanyabaa, anjl ni la Miguel con ree xi anjlamан gudijlné reeman dragon guin con ree xi anjlib. ⁸ Per ad beent be guin gan con ree xi anjlib loj anjl Miguel con ree xi anjlamан, dxel ad gojctri nibajn be guin xanyabaa con ree xi anjlib. ⁹ Zianan zeel bazaar reeman dragon guin loj guidxliuj con ree xi anjlib. Dragon guin naj bëël gulal ni la xindxab né satanás xin rusquiee gra ree bénguidxliuj.

Ni balüü Jesucrist loj San Juan 12:10xxviiNi balüü Jesucrist loj San Juan 13:1

10 Dxel biguien cha' tijb bejn rejs da't diizd xanyabaa rëbaman:

—Ma bidxin dxej baslaa Dios dunuj ree, ma bidxin xgualniabeeman chi nabeenëman Jesucrist, din ma biquied bén rbe'c xgualquia ree dux compniar ree, bén rdxinnë ree guialquia guin loj dux Dad ree Dios dxej guiaal. **11** Abi' dux compniar ree been reeman gan por rejn ni guxhie' bén naj zi'c xi xil Dios në por ni rëb reeman xhienaa rliladx reeman xtiidx Dios, ad bidxebt reeman majsí niëjt reeman. **12** Zeel gol badxe'luxdoodi nix gra ree bén zojb xanyabaa per, iprobza lëjt bén zojb ree loj guidxliuj në ree be yu' loj nijsdoo! Din ma biguiajt xindxab lod zojbidi, däd rdxe'chix guial ragbeex sta'nz dxej raya'n par laax.

13 Chi baguiaa dragon guin guial ma biajbib guidxliuj, dxel briinalib bëngunaa naj xniaa xindo guin. **14** Dxel badëë reeman tio'p xil bëngunaa guin zi'c xil bisiaro' din gac suman loj bëël guin xt lod naj ganax yujbidx, lod gudëëd reeman ni gawan man choon ijj garol. **15** Abi' gulëë ro' dragon guin tijb guiw nijs din chinën bëngunaa guin. **16** Per bixal loj guidxliuj persi gu'n guibidx nijs gulëë ro' dragon guin. Zian been guidxliuj bëngunaa guin yudar. **17** Dxel däd bidxe'ch dragon guin bëngunaa guin, abi' zitilnëb sta'n ree bén ni za loj xdiaaman, bén ruzoob ree xtiidx Dios zinal tëë reeman xtiidx Jesucrist.

13

Tio'p ree bedoxh

1 Wej dragon guin bisub ro' nijsdoo. Abi' naj baguia guial brii tijb monstruo loj nijsdoo, tijb

Ni balüü Jesucrist loj San Juan 13:2xxviiiNi balüü Jesucrist loj San Juan 13:10

bedoxh be yu' gajdx guijc, chii xcajchib abi' loj tijb gaj cajch guin yu' tijb gaj coron, abi' loj guigajdx guijquib ca tijb diidx ni rnieeguijdx Dios. ² Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badëëdib loj monstruo guin xluarib lod rniabeeb abi' guialrniabeero' ca'b par nabeeb. ³ Tijb guijc monstruo guin baguian tijb lod nadxeelguijdx ni rulüü ad zusbajnt laab, per bayajc lod nadxeelguijdx guin abi' gra ree benguidxliuj badxaloj abi' binal reeman monstruo guin. ⁴ Dxel gojp da't reeman respejt dragon guin guial badëëdib guialrniabee loj monstruo guin gojp da't tëe reeman respejt monstruo guin, rëb reeman:

—¿Chu naj zi'c monstruo guin abi' chu zajc til con laab?

⁵ Monstruo guin gojcchaaw ro'b par guilie xvalor gajquib, abi' guinieeguijdxib Dios, gojpib guialrniabee par güünb zian loj choon ijk garol.

⁶ Abi' guneeeguijdxib Dios, guneeb diidxmal ree por laaman, por xyadooman nè por gra ree bén zojb xanyabaa. ⁷ Gojp monstruo guin permis par sub contr ree xbejn Dios abi' güünb laa reeman gan. Abi' gojpib guialrniabee par nabeeb graloj ree bejn, bén ni rniece ree gadxagayaa diidx, bén gra lad ree, gra ree nacion. ⁸ Gra ree bén ad cat laj loj xlibr guialnaban diizd chi gad guidxliuj gacchaaw, loj xlibr bén naj zi'c xi xiil Dios bén güt por ree bejn, gra reeman gap da't respejt monstruo guin. ⁹ Bén rën ree gucaagdiajg, gol bacaagdiajg. ¹⁰ Bén naj che ladxguiib, cheman ladxguiib. Bén naj guiët con espad, con espad guiëtaman. Zeel bén

Ni balüü Jesucrist loj San Juan 13:11xxix Ni balüü Jesucrist loj San Juan 13:18

naj ree xbejn Dios ad yadxaguidi ad gucwëëz tëë chililadxidi Dios.

¹¹ Dxel baguan stijb monstruo ren briib loj guidxliuj, yu' tio'p xcajchib zi'c xcajch xiil, per cha'b naj zi'c cha' dragon. ¹² Abi' lasa'gajc guialrniabee ca' monstruo ni brii loj nijsdoo lasa'gajcan ca'b abi' por laab gojp da't ree bejn respejt monstruo ni brii loj nijsdoo, monstruo ni bayajc lod nadxeelguijdx ni rulüützi gugüjt laab. ¹³ Abi' monstruo ni brii loj guidxliuj në gajquib rüjn milagr naroob ree, xt rajc rniabeeb rguiajt bajl diizd xanyabaa xt loj guidxliuj delant loj ree bejn. ¹⁴ Zian rusquieeb benguidxliuj ree por ree milagr ni rünb delant loj monstruo ni brii loj nijsdoo, abi' rniabeeb rüjn ree benguidxliuj tijb xfigur monstruo ni brii loj nijsdoo, monstruo ni bidxeelguijdx con espad abi' gubajnb. ¹⁵ Abi' monstruo ni brii loj guidxliuj xt gojpib guialrniabee par gudëëdib guialnaban loj xfigur monstruo ni brii loj nijsdoo, par guiniee figur guin në par gugüjtib gra ree bén ni ad rajpt respejt figur guin. ¹⁶ Gunabee tëë monstruo ni brii loj guidxliuj gra ree bejn, zi'c ree bengol zi'c ree xindoo, benrijcw ree në ree bénprob, bén naj ree zi'c bén nado' në ree bén ad najt zi'c bén nado', din chu' sen yaa reeman ladbee o lucwaj reeman. ¹⁷ Abi' achut zajc sii o guto' ya bal id ca reeman sen guin, abi' sen guin naj laj monstruo guin o xinumbrib.

¹⁸ Guie ryaadx guialrignia'. Bén rajp guialrignia' cwëë xcwentaman con xnumbr monstruo guin, abi' numbr guin naj xho'pgayuu gayojnbixho'p. Con numbr guin riri laj tijb benguidxliuj.

14

Cant ni biil tibgayuu tiuubitap mil ree bejn

¹ Baguia tëen guial za' bén naj zi'c xi xiil Dios guijc dajn ni la Sión. Bén naj zi'c xi xiil Dios za'man con tibgayuu tiuubitap mil ree bejn, graczi reeman ca lucwaj reeman laj bén naj zi'c xi xiil Dios në laj xDadaman. ² Abi' biguejnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusidx zien ree bejn arp. ³ Dxel rool reeman tijb cant cüb delant loj yagxhil lod zojb bén rniabee në loj guidap ree be za'yagaj në loj ree bengol guin. Ad zile't chu gusiid cant guin, naabzi ree bén tibgayuu tiuubitap mil guin, laa reeman naj bén gulaa loj ree bénguidxliuj. ⁴ Abi' laa reeman naj ree xinguaaw ni ad bagaalt béngunaa, gojc reeman naya abi' zinal reeman bén naj zi'c xi xiil Dios bantëëz guin rejman. Laa reeman naj ree bén gulaa loj ree bénguidxliuj abi' zi'c guialnaza'c yaloj ni rinë bejn loj Dios zian naj reeman delant loj Dios në delant loj bén naj zi'c xi xiil Dios. ⁵ Ad goct basquiee reeman, nayadxuj reeman delant loj Dios.

Ruson ni badëë guiyon ree anjl

⁶ Dxel baguian tijb anjl rzujman xanyabaa con tijb ruson ni naj par tiblayaa par gugojnman gra ree bén nabán loj guidxliuj, xhietëëz diidx rníee reeman, o xhietëëz loj diaa zëëd reeman, o xhietëëz ciuda o nacion zëëd reeman. ⁷ Dxel dák rejs gunee anjl guin rëbaman:

—Gol bidxeb Dios, gol gules xvaloraman, din ma bidxin hor yadëëd ree bejn cwent lojman. Gol

Ni balüü Jesucrist loj San Juan 14:8xxxNi balüü Jesucrist loj San Juan 14:15

gojp da't respejt bén been xanyabaa, guidxliuj në nijsdoo në lod rajch nijs.

⁸ Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda naroob guin gra ree benguidxliuj guial güün reeman graloj ree nidxuudx, graloj ree dol ro'.

⁹ Dxel rejs da't gunee anjl bayon guin rëbaman:

—Bal chu gap da't monstruo guin respejt con xfigurib abi' tiëbaman tia xsenb lucwajman o yaaman, ¹⁰ bén zii yayal xcasti naroob Dios, zro' da't gudéedaman laaman casti. Abi' sagdajman loj bajl ni caye'c azufre delant loj ree xianjl Dios në delant loj bén naj zi'c xi xiil Dios. ¹¹ Ad yu' tëët dxej yayü' bajl guin. Ni'qui radxe ni'qui guiaal achet guialraziiladx par ree bén rajp da't respejt monstruo guin con xfigurib, o bén ca ree xsenb. ¹² Zeel bén naj ree xbejn Dios bén ruzoob ree xtiidxaman abi' rliladx reeman Jesucrist, ad rayalt yalenya' reeman.

¹³ Bigueijn tëën cha' bén ni na lon diizd xanyabaa:

—Bacaa ni ganin lojl: “Diizd yan xiquilbaa ree bén rëjt con guialrliladx Jesucrist.”

Dxel rëb xSprijt Dios: “Walican din ma yaziiladx reeman xcwent ree guialzi ni gudëd reeman abi' chinë reeman guialbenza'c reeman.”

Guialnaza'c ni runee guidxliuj

¹⁴ Dxel baguijan tijb zaj naquich abi' loj zaj guin zojb zi'c tijb bejn. Yu' tijb coron or guijcaman abi' yaaman ca'man tijb hoz ni nadoxh ro'. ¹⁵ Dxel brii

Ni balüü Jesucrist loj San Juan 14:16xxxiiNi balüü Jesucrist loj San Juan 15:1

stijb anjl lén yadoo abi' rejs da't guneeman bén ni zojb loj zaj guin rëbaman:

—Badxe' xi hosil, batüüg ree guialnaza'c loj guidxliuj din ma gojl reen ma bidxin tiamp ni yado'p reen.

¹⁶ Abi' bén zojb loj zaj guin badëed xi hosaman loj guidxliuj abi' bato'paman guialnaza'c loj guidxliuj.

¹⁷ Dxel brii stijb anjl lén yadoo ni naj xanyabaa, ca' gajcaman tijb hoz ni nadoxh ro'. ¹⁸ Dxel niz loj altar brii stijb anjl bén rajp guialrniabee par bajl, abi' dák rejs guneenëman bén ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

¹⁹ Dxel badëed anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios. ²⁰ Dxel xijch ciuda guin bixii ree uv guin abi' lén lod bixii ree uv guin birii rejn. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

15

Bén naj ree xi anjl Dios con guigajdx ree guialzi

¹ Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx guialzi. Guialzi guin ree naj gajdx ni chigra gac din con guialzi guin ree gusiaaloj Dios xcastiman.

Ni balüü Jesucrist loj San Juan 15:2xxxiiiNi balüü Jesucrist loj San Juan 15:8

² Baguia tēen zi'c nijsdoo, per najn zi'c tijb vidr xcolor bajl. Dxel lojn za' ree bén been ree gan loj monstruo, loj figur con loj xnumbrib, ca' reeman arp ni badëed Dios loj reeman. ³ Abi' cayool reeman xcant Moisejs xbejn Dios nē xcant bén ni naj zi'c xi xiiil Dios, rëb cant guin:
Naroob nē ni diidxli radxaloj bejn
naj ree ni rüjnl, dux Dadan Dios Bén rajp gra
guialrniabee.

Xnejz da't nē zi'c rayal rüjnl,
lüj guial rniabeel gra ree benguidxliuj.

⁴ ¿Chu ad zadxebt lüj?
¿Chu ad zuza'tt lüj zagdxe, dux Dadan Dios?

Tijbzi lüj naj bén naya nali
abi' benguidxliuj gui't gap da't reeman lüj respejt
guial ma balüül bejn ree guial xnejz rüjnl.

⁵ Chi gulox baguiian ni guin ree, dxel baguiian bixal
luar lod mazri nagle' lén xyadoo Dios xanyabaa.

⁶ Abi' lén yadoo guin brii gajdx ree anjl bén ca'
ree gajdx ree guialzi, najcw reeman lajd naquich
ni rdiin bacha', abi' naxii tijb cinch or luxdoo
reeman. ⁷ Abi' tijb guidap ree be ni za' lod za'
Dios, badëeb loj tijbgaj ree anjl guin tijb cojp or
ni guidxa xcasti Dios bén nabán guidib tiamp nē
par tiblayaa. ⁸ Abi' lén yadoo guin gudxan xgo'xh
xbacha' Dios nē xguialrniabeeman. Achut gojc
niu lén yadoo guin xt chi ma gulox guigajdx ree
guialzi ni zidnē ree anjl guin.

16

Cojp ni guidxa ree xcasti Dios

Ni balüü Jesucrist loj San Juan 16:1xxxxNi balüü Jesucrist loj San Juan 16:9

¹ Dxel biguiejnan cha' bejn rejs da't guneman diizd lén yadoo guin, rëbaman loj guigajdx ree anjl guin:

—Gol chej, gol bigla't xcasti Dios ni yu' loj guiga-jdx ree cojp guin loj guidxliuj.

² Dxel wej anjl yaloj guin, bala'taman ni yu' loj xcojpaman loj guidxliuj. Abi' gra ree bén ni yu' xsen montruuo guin bén gop da't ree respejt xfigurib, brii guiadxyoodx lad reeman, ni rdoob da't.

³ Abi' anjl barojp guin bala'taman ni yu' loj xcojpaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

⁴ Anjl bayon guin bala'taman ni yu' loj xcojpaman loj ree guiiw në lod rajch ree nijs abi' nijs guin ree bayajc reen rejn. ⁵ Abi' biguiejnan rëb anjl ni rnibiaee ree nijs guin:

—Xnejz naj ni cayüjnl në zi'c cayüjn xguialgux-tisil, Dad Dios, lüj naj bén naya nali, najl Dios yan në diizd gocli. ⁶ Din bënguidxliuj ree guxhie' reeman rejn bagüjt reeman xbejn reel në ree bén badëed ree xtiidxil. Zeel ma badëédil rejn guië' reeman, abi' zian rayal reeman.

⁷ Abi' niz loj altar biguiejnan cha' stijb bén rëb:

—Walican, Dad Dios bén rajp gra guialrniabee. Xnejz në zi'c rayal cayüjn xguialguxtisil.

⁸ Abi' anjl badajp guin bala't ni yu' loj xcojpaman loj gubijdx din guze'can bejn ree zi'c bajl.

⁹ Gra reeman we'c por xguialnalaa da't gubijdx guin. Per ni'qui zian ad bayüjnt reeman xgab por xtol reeman, ad baza'tt reeman Dios zagdxe

Ni balüü Jesucrist loj San Juan 16:10xxxv Ni balüü Jesucrist loj San Juan 16:17

guneeguijdxli reeman laaman, laaman guial najman bén rniabee ree guialzi guin.

¹⁰ Anjl bagaay guin bala'taman ni yu' loj xcojpaman lod rbej monstruo ni rniabee guin, abi' bicajy loj guidxliuj, abi' xt rawya' lüdx ree bejn por guialzi ni cadëd reeman. ¹¹ Per ni'czi zian ad basa'nt reeman ni mal ni rüjn reeman, al mazri been reeman por guialzi ni gudëd reeman në por guiadx ni gudxib lad reeman, guneeguijdx reeman Dios bén zojb xanyabaa.

¹² Anjl baxo'p guin bala't ni yu' loj xcojpaman loj guiiwro' la Eufrates abi' gubidx nijs loj guiiw guin. Zian bixal nejz din téd ree rey bén zëéd ree lad lod rliejn gubijdx. ¹³ Dixel baguian ro' dragon guin, con ro' monstruo guin në ro' bén rusquiee rëb rudëë xtiidx Dios loj ree bejn brii choon ree sprijt mal ni naj zi'c bidx. ¹⁴ Guiyon ree sprijt guin naj xsprijt xindxab, abi' rüjn reen milagr abi' rej reen lod za' gra ree rey loj guidxliuj persi rado'p reeman din til reeman con Dios bén rajp gra guialrniabee, dxej ni gui'taman guidguieenman gan loj gra reeman.

¹⁵ Rëb Jesucrist:

—Gol badxe'guijc guial dxejczi guialan zi'c chi ri't tijb xingubaan tijbz golp. Xiquilbaa ree bén rbëz naj, bén za'sin ree chi guialan din chiteë yaya'nxtu reeman zi'c chi rniaaz bén za' zibëël.

¹⁶ Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

¹⁷ Abi' anjl bagajdx guin bala't ni yu' loj xcojpaman loj bi, abi' diizd lën yadoo ni yu' xanyabaa niz

Ni balüü Jesucrist loj San Juan 16:18xxxviNi balüü Jesucrist loj San Juan 17:4

lod za' xyagxhil bén rniabee, biguien rejs da't cha'
bén rëb:

—Ma bayaaloj gojc ni rayal gac.

¹⁸ Abi' guzuloj rë'p nijs, rajc naquie', rbidxa' guzi-aaw dxel bi't xodoxh, tijb xodoxh ni ad goct wayi't diizd guzuloj yu' bejn loj guidxliuj, din xu guin naj ni mazczi ni doxh. ¹⁹ Abi' gula' ciuda naroob guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëë xcasti ro'man loj ciuda naroob guin. ²⁰ Abi' gunijt ree gra yuj riga' loj nijsdoo në ree guia!. ²¹ Biajb tëë guiajyabaa guijc ree gra ree bénguidxliuj, dxel tijbgaj ree guiaj yabaa guin na' reen cost tiuu quil. Abi' ree bejn guneeguijdx reeman Dios, por ree guialzi guin, guial däd ni doxh gojc chi biajb ree guiajyabaa guin.

17

Guialguxtis ni güün Dios con béngunaa dxuudx

¹ Abi' tijb guigajdx ree anjl guin bi'taman naman lon:

—Guda din gulün lüj casti ni rayal béngunaa dxuudx ni zojb loj nijsro', ² laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguiiwaman bejn ree loj guidxliuj con ree ni ad rüjnt sirv ni rüjnman.

³ Abi' por xSprijt Dios binë anjl guin naj lod naj ganax yujbidx. Ni baguian tijb béngunaa dxibaman tijb monstruo xnia, abi' guidib ladib ca diidxguijdx par Dios, yu' gajdx guijquib con chii xcajchib. ⁴ Abi' béngunaa guin najcwaman lajd murad në ni xnia, najcchaawnën ganax or në ree guiaj zagdxe në ree perl. Abi' ca'man tijb

Ni balüü Jesucrist loj San Juan 17:5xxxvii Ni balüü Jesucrist loj San Juan 17:12

cojp or guidxa ree ni nabixhladx lojn në ree ni dxuudx ni rüjnman.⁵ Abi' lucwajman ca tijb letrer ni achutczi rignia' ni rën guiëban, rëb loj letrer guin: "Babilonia, ciuda naroob ni naj xniaa ree bengunaa dxuudx në xniaa ree ni dxuudx ni rajc loj guidxliuj,"⁶ Dxel gogbeen guial rzüdx bengunaa guin con xrejn ree xbejn Dios, con xrejn ree bén ni güt guial gunee reeman xtiidx Jesús. Abi' dát badxalon chi baguian zian.⁷ Dxel na anjl guin lon:

—¿Chexc zeel dát radxalojl? Naj gusignia' lüj ni rën guiëb bengunaa ni baguiaal në monstruo ni dxibaman, be ni yu' gajdx guijc con chii xcajch.⁸ Monstruo ni baguiaal, laab naj be guban gocli, per yan ad nabantrib. Per gulüülojb lén bizë ni ad yu't lod rliox dxelri nidlojb tiblayaa. Abi' ree bén naban loj guidxliuj, bén ni ad cat ree laj loj xlibr guialnaban diizd gocli chi gad guidxliuj gacchaaw, laa reeman yadxaloj chi guguaa reeman monstruo ni guban gocli, be ad nabant yan per gui'tib.

⁹ 'Guie ryaadx quiarguejn. Guigajdx guijc monstruo guin rën guiëban gajdx guia' lod zojb bengunaa guin¹⁰ rën tée guiëban gajdx ree rey. Gaay ree rey guin ma gudéed xguialrniabee, abi' bén baxo'p guin naj bén canabee yan. Dxelri nabee bén bagajdx guin, per ad xchejt nabeeman.¹¹ Abi' monstruo ni guban gocli, abi' yan ad nabantrib, laab gac rey baxujn, per loj gajc gajdx ree rey guin grii rey gac xhujn dxel yayalib lod rayalib casti par tiblayaa.

¹² 'Guidxii cajch ni baguiaal rën guiëb chii ree rey ni ad wazulojt nabee. Per chi tia' reeman

Ni balüü Jesucrist loj San Juan 17:13xxxviiiNi balüü Jesucrist loj San Juan 18:2

guialrniabee, ad xchejt nabee reeman con monstruo guin. ¹³ Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstruo guin, ¹⁴ abi' til reeman con bén naj zi'c xi xiil Dios. Per güün bén naj zi'c xiil guin laa reeman gan din laaman naj Dad loj gra ree dad, naj téeeman rey loj gra ree rey. Abi' bén za' ree con bén naj zi'c xi xiil Dios, laa reeman naj bén bazoob xtiidx Dios, bén ma naj ree par laaman abi' diidxli zinal reeman xnejz Dios.

¹⁵ Na tée anjl guin lon:

—Nijs ni baguaal lod zojb béngunaa dxuudx guin laan rën guiëb graloj ree bén rniece graloj ree diidx, bén gra lad ree, bén zëed ree gra loj ree nacion. ¹⁶ Abi' monstruo guin con guidxii xcajchib ni baguaal, guidxe'ch reeman béngunaa dxuudx guin, tio'nladx reeman laaman, gusa'n reeman zibëélaman, gaw reeman xbëélaman abi' guze'c reeman laaman. ¹⁷ Dios yazaladx loj guidxii ree rey guin quiarguejn din güün reeman zi'c rënman. Yaya'n reeman diidx din yayü xguialrniabee reeman loj monstruo guin, xt gac cumplid ni rëb Dios gac. ¹⁸ Abi' béngunaa ni baguaal, laaman naj ciuda naroob ni rniabee ree rey yu' loj guidxliuj.

18

Biajb guiedx Babilonia

¹ Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj, ² abi' rnieeman rejs da't rëbaman:

Ni balüü Jesucrist loj San Juan 18:3xxxxNi balüü Jesucrist loj San Juan 18:9

—Ma biajb, ma biajb Babilonia ma naj ciuda na-roob guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuj, bedxuudx ree be rbijxhladx ree bejn. ³ Din zi'c chi rusüdx bejn stijb bejn, zian ma batiaalguiw ciudaro' guin gra ree bénguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bén rüjn negojs loj guidxliuj ma naj reeman rijcw por graczi ree ni dxuudx rajc ni.

⁴ Dxel biguiejnan cha' stijb bén gunee diizzd xanyabaa rëbaman:

—Gol brii loj ciuda guin, da bejn reen, chiteë go'chidi loj ree dol ni rajc ni chiteë tédidi guialzi ni gac ree loj ciuda guin. ⁵ Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree. ⁶ Gol beennë ciuda guin zi'cgajc beennën ben ren ree, gol been din yaguijxan xcastin tio'p volt mazri guial loj ni beennën bejn ree abi' gol basagdajn tio'p volt mazri guial loj ni basagdajn ben ren ree. ⁷ Gol basagdaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bén rniabee, ad najtan bén bizëjb ad yu' téejt dxej chu'nayan.” ⁸ Zeel tijbz dxej guidxajg lasa' ree guialzi par ciuda guin, zi'c guialgüjt, guialrunaya, guialrliaan, dxel che'can con bajl. Din naroob xguialrniabee dux Dad ree Dios bén gudëed casti ciuda guin.

⁹ Abi' ree rey ni yu' loj guidxliuj, bén babaan ree guial been reeman ni dxuudx con ciuda guin, zoon reeman, naya sagdaj reeman chi guguaa

Ni balüü Jesucrist loj San Juan 18:10 xl Ni balüü Jesucrist loj San Juan 18:18

reeman go'xh ni caye'can. ¹⁰ Abi' zift su reeman chi guguaa reeman casti ni cadëdan, dxel guiëb reeman:

—;Probza lüj, probza lüj Babilonia, ciuda naroob ni guyu gojl par gra! Din tibrajtzi bi't casti par lüj.

¹¹ Abi' ree bén rüjn negojs loj guidxliuj zoon reeman zu tée luxdoo reeman naya por ciuda guin, din achutri sii ni ruto' reeman, ¹² zi'c or, plajt, guiaj zagdxe ree, perl, lajd zagdxe ree, lajd sed ree culor murad con ni xnia, në graloj ree tabl ruree nejxh në graloj ree ni been reeman con ree tabl zagdxe, bronce, guuib con marmol në marfil. ¹³ Ad zajc téeetri guto' reeman canel në graloj ree ni ruree nejxh, ad zajctri guto' reeman goxyaal, mirra, perfum, vin, sejt oliv, harin zagdxe, trigo, go'n, xiil, way, carrejt, ad zajc téeetri ree guto' reeman bejn ree. ¹⁴ Abi' guiëb reeman loj ciuda guin:

—;Ad rajptril guialnaza'c ni bayuladx da'til, tiblayaa ma banijtil zi'c gubanl con gra ree ni za'c ni gopil!

¹⁵ Gra ree bén been negojs, bén gojc ree rijcw por ciuda guin, zift su reeman guialrdxeb reeman casti ni cadëd ciuda guin. Zoon reeman, zazagdiaj reeman, zunaya reeman. ¹⁶ Abi' guiëb reeman:

—;Probza, probza ciuda naroob guin! Laan guial guzujchaawan con ree lajd zagdxe, lajd culor murad con ni xnia, laan guial guzujchaawan con or, con perl në con guiaj zagdxe ¹⁷ din, ;tibrajtzi gunidloj gra ree guialnaza'c guin!

Gra ree bén zë lën barcw, zi'cgajc xcapitan ree barcw, gra ree mariner në los demazri ree bén rüjn dxiin lën barcw, guzudxe reeman zift ¹⁸ chi

Ni balüü Jesucrist loj San Juan 18:19xliNi balüü Jesucrist loj San Juan 18:24

baguiaa reeman go'xh ni cayë'c ciuda guin, abi' gurixdiaj reeman rëb reeman:

—¿Goc guyu tijb ciuda lasa' ciuda ro' guie?

¹⁹ Abi' baroob yuj guijc reeman, roon reeman abi' guyunaya luxdoo reeman rëb reeman:

—¡Probza!, probza ciuda naroob guin por xguial-naza'can gra ree bén been negojs bén rajp ree barcw gojc reeman rijcw, din tibrajtzi gunidlojn.

²⁰ Dxel biguien cha' bén na:

—Per läjt bén zojb ree xanyabaa, läjt najdi xi apóstoles Jesucrist, läjt bén rudëed ree xtiidx Dios në los demazri ree bén naj xbejn Dios, gol babaa por ni cazajc ciuda guin din zian cayüjn Dios xguialguxtisaman por ni beennë ciuda guin läjt.

²¹ Abi' tijb anjl gojl da't, gulesaman tijb guiaj naroob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazalbin guiaj guie con guidib da gojlan zian nidoxh sac ciuda naroob Babilonia, abi' achutri guguaa Babilonia guin stijb. ²² Ad zaguientri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zaguientri loj ciuda guin. Achutri bejn güün dxiin ni, ni'qui xnaquie' mulin ad zaguientri ni. ²³ Achetri guij che'c loj ciuda guin, achutri guxhliaa. Gra ree bén been negojs loj ciuda guin ganax bén zojbloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

²⁴ Abi' loj ciuda guin bagüjt reeman bén badëed ree xtiidx Dios, në ree bén rliladx Dios, abi' por ciuda guin bagüjt reeman los demasri ree bén ma güjt loj guidxliuj.

Ni balüü Jesucrist loj San Juan 19:1 xlvi Ni balüü Jesucrist loj San Juan 19:6

19

¹ Chi gulox baguian biguiejn tëen zian, dxel däd rejs biguiejnan cha' zien da't ree bén canee xanyabaa rëb reeman:

¡Quixtëë Dios! Por dux Dad ree Dios zëed perdon, respejt në guialrniabee,

² din laaman waliman abi' xnejz rüjn xguialguxtisaman,
ma badëédaman casti béngunaa dxuudx ni bazaalguiiw

bénguidxliuj ree con ree xni malaman,
ma been Dios guialguxtis con laaman persi baguijxaman ni bagüjtaman xbejnman.

³ Abi' biguiejnan rëb reeman stijb:

—¡Quixtëë Dios! Ad yu't dxej yayü' go'xh ni caye'c ciuda guin.

⁴ Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rëb reeman:

—¡Quixtëë Dios! ¡Diidxza'c guin ree naj par laaman!

⁵ Abi' niz lod za' yagxhil guin biguiejnan cha' bén rëb:

Gradi zi'c bengol zi'c xindoo
gol gules xvalor dux Dad ree Dios,
lüjt rüjndi laaman sirv abi' rajpidi laaman respejt.

Xguialruxhliaa bén naj zi'c xi xiil Dios

⁶ Biguiejn tëen zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:

¡Quixtëë Dios! Din ma canabee dux Dad ree Dios,
bén ca' gra guialrniabee.

Ni balüü Jesucrist loj San Juan 19:7xliliNi balüü Jesucrist loj San Juan 19:13

⁷ Yan yadxe' du luxdoo ree zagdxe, yabaa ree yales
tëë ree xvaloraman.

Din ma bidxin dxej guxhliaa bén naj zi'c xi xiilaman

abi' bén gac lacheelaman ma za'chaawaman.

⁸ Najcwaman lajd zagdxe, ni naquich, naya rulaa
tëën bacha'.

Din lajd naquich guin rën guiëban ni zagdxe ni
been ree xbejn Dios.

⁹ Abi' na anjl guin lon:

—Bacaa: “Xiquilbaa ree bén naj gui't loj xguialruxhliaa bén naj zi'c xi xiil Dios.”

Na tëë anjl guin:

—Ni guie ree naj xtiidxli Dios.

¹⁰ Dxel bazuxiban loj anjl guin par ga'p da'tan
laaman respejt, per naman lon:

—Ad güünl zian. Din zi'cgajc lüj xmandadzi
Dios cayguieen, zi'cgajc gra ree lasa'l bén wali ree
rüjncwent xtiidx Jesucrist. Gojp da't respejt Dios.

Din por Jesús zëëd ni rniece ree bén rudëëd xtiidx
Dios.

Bén dxiiib tijb way naquich

¹¹ Dxel baguian zojbyal xanyabaa baguia
tëën tijb way naquich. Bén dxiiib laab laman:

Bén ruzoob xtiidxaman në bén wali, din
xnejz rüjn xguialguxtisaman në xwadijlamana,

¹² guiaalojman rulaan bacha' zi'c bajl abi' zien
ree coron yu' guijcaman, tib lajtaman ca laj tijb
bejn ni achut rignia', tijbzi laaman ragbee xhie
rën guiëban, ¹³ guidib rejnzi xabaman, abi' laman
Xtiidx Dios.

Ni balüü Jesucrist loj San Juan 19:14xliv Ni balüü Jesucrist loj San Juan 19:20

14 Abi' ree xsuldadaman bén yu' xanyabaa zinal reeman laaman dxiib reeman way naquich, na-jcw reeman lajd zagdxe ni naquich ni naya tée.

15 Ro'man ririi tijb espad ni nadoxh ro', con espad guin gudéedaman casti bénguidxliuj, në con var guuib nabbeeman laa reeman. Zí'c rë'p bejn guijc uv par guixiin, zian gudéedaman loj reeman casti naroob ni zëed por Dios bén rajp gra guialrniabee.

16 Loj xcajpaman con cüdaman ca ree diidx ni rëb: "Rey bén rniabee loj ree rey në Dad bén rniabee loj ree dad."

17 Dxel baguian tijb anjl za'liman loj gubijdx, däd rejs rbidxa'man, rbejdxaman gra ree be ni rzuix xanyabaa, rëbaman:

—Gol guda, gol bachajg lasa'di lod gunee Dios ni gawidi zro' da't, **18** zi'c xbëél ree rey, xbëél ree capitan, xbëél ree bén achut rüjn gan, zi'c xbëél ree way, xbëél ree bén rbib laa reeb, xbëél gra ree bejn, zi'c xbëél ree bén naj zi'c bén nado' në xbëél ree bén ad najt zi'c bén nado', zi'c xi bëél ree bengol në ree xindoo.

19 Dxel baguian monstruo con ree rey yu' loj guidxliuj në ree xsuldad reeman, nadxag lasa'reeman par til reeman con bén dxiib way naquich guin con ree xsuldadaman. **20** Per laa reeman gunaaz reeman monstruo guin con bén rusquiee rëb rudëë xtiidx Dios loj ree bejn, bén rüjn milagr niz loj monstruo guin. Abi' por ree milagr guin basquieeman bén guyu ree xsen monstruo guin gojp tée reeman respejt xfigurib. Abi' monstruo guin con bén rusquiee ni rëb rudëë xtiidx Dios loj ree bejn, grop reeman guidib naban reeman bazaar reeman laa reeman loj bajl lod caye'c

Ni balüü Jesucrist loj San Juan 19:21 xlvi Ni balüü Jesucrist loj San Juan 20:6

azufre. ²¹ Abi' los demazri ree xbejn monstruo guin güjt reeman con espad ni ririi ro' bén dxiiib way naquich guin, abi' gudaw ree be ni rzuj xanyabaa laa reeman, xt gudxa lén reeb gudaw ree xbëël reeman.

20

Ti mil ijz

¹ Dxel baguian zidguiajt tijb anjl xanyabaa, ca'man xguiibliaw bizë ni ad yu't lod rliox, ca' téeeman tijb caden naroob. ² Abi' gunaazaman dragon, bëël gulal ni la xindxab né satanás, gux-hiiman laab con caden guin por timil ijz. ³ Dxel bazaalaman laab lén bizë ni ad yu't lod rliox abi' basiaawdxi'chaman bizë guin chitëë gusquieeri reeb bejn ree loj guidxliuj xt chi ma bayaloj timil ijz dxel yariib lén bizë guin tibladëd.

⁴ Dxel baguian yagxhil zagdxe ree lasa' xyagxhil ree rey, lojn zojb ree bén ni ma cwa' guialrniabee par güün reeman guialguxtis. Baguia tëën xsprijt ree bén ni biru' yéjn guial gutie'ch reeman xtiidx Dios né gra ni ragbee reeman por Jesús. Laa reeman ad gojpt respejt monstruo guin ni'qui xfigurib abi' ad cwëjbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz.

⁵ Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz.

⁶ ¡Xiquilbaa ree bén yaban yaloj! Laa reeman ma naya niz loj Dios abi' ad zayaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenë reeman laaman timil ijz guin.

Ni balüü Jesucrist loj San Juan 20:7xlviNi balüü Jesucrist loj San Juan 20:14

⁷ Chi ma bayaaloj timil ijj guin, dxel yarii xindxab guin lod nayaawix ⁸ Par gusquieex bejn ree guidib guidxliuj. Gusquieex Gog né Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo. ⁹ Gra lad gui't reeman, guido'p reeman gadëd lod za' ree xbejn Dios né gadëd ro' guiedx lod rënman. Per laaman diizd xanyabaa guixhiaalaman bajl ni guze'c bén guin ree xt yadëj reeman. ¹⁰ Abi' xindxab ni basquiee laa reeman laax chu' loj bajl lod caye'c azufre, lod ma za' monstruo con bén rusquiee rëb rudëë xtiidx Dios loj ree bejn, lod ad yu't dxej yarii reeman lod sagdaj tëe reeman dxej guiaal.

Yadëëd ree bejn cwent loj Dios

¹¹ Dxel baguian tijb yagxhil zi'c xi yagxhil rey, tijb yagxhil naroob ni naquich. Lojn zojb tijb bejn abi' delant lojman biquied guidxliuj né xanyabaa, gunidloj reen tiblayaa. ¹² Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xguialguxtisaman con ree bengüt guin zi'c ca loj ree libr guin xcwent ree ni been reeman. ¹³ Nijsdoo bayü xbengütan, abi' guialgüjt bayü xbengütan, abi' ree bengüt ni za' lod cabëz reeman guidxin dxej ni yadëëd reeman cwent loj Dios, bibig reeman yagaj din güün xguialguxtis Dios con laa reeman bal conin been reeman. ¹⁴ Dxel guialgüjt con lod guzu ree bengüt gulëjz reeman guidxin dxej yadëëd reeman cwent loj Dios, grop reen bazaar reeman loj bajl, bajl guin

Ni balüü Jesucrist loj San Juan 20:15xlviiNi balüü Jesucrist loj San Juan 21:7

naj guialgüjt barojp. ¹⁵ Abi' loj gajc bajl guin bayal
ree bén ad cat laj loj xlibr guialnaban.

21

Xanyabaa cüb con guidxliuj cüb

¹ Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaloj ma gunijt reen, ziangajc nijsdoo. ² Dxel baguian Jerusalén cüb, xguiedx naroob Dios zidguiajtan xi xanyabaa Dios. Dád za'chaawan zi'c rzujchaaw tijb biungunaa chi ma guxhliaam con xin gac lacheelim. ³ Abi' dád rejs biguejnan cha' bén gunee lod za' xyagxhil Dios, rëbaman:

—Ma za' Dios con ree bejn, guibannëman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman. ⁴ Laaman gutiaa loj reeman nijs biin reeman, dxel achetri guialgüjt chu', guialroon, guialrunaya né guialzi, din gra ree ni guyu gocli ma gudëd reen.

⁵ Abi' bén zojb loj yagxhil guin, naman:

—Gra cayünan nicüb.

Na téeeman:

—Bacaa ree diidx guie, din laa reen naj diidxli ni rayal chililadx bejn.

⁶ Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diizd guia'xchej né par tiblayaa. Bén re'c nijs, naj yazaladx nijs lojman nijs ni ririi lod rajch nijs ni runee guialnaban.

⁷ Bén ni güün gan loj dol, laaman yayal gra ree ni guin. Abi' naj gac xDiosaman guiáad laaman

Ni balüü Jesucrist loj San Juan 21:8xlviiiNi balüü Jesucrist loj San Juan 21:14

gac da xi'nan. ⁸ Per ree bén rdxeb sudxi'ch loj ni rliladx reeman naj, bén ad rliladxt ree naj, bén ruladx ree güün ganax ni mal, bén rugüjt ree bejn, bén rüjn ree nidxuudx con ree bén ad najt lacheel reeman, bén rüjn ree guialbidxaa, bén rën ree ni naladx reeman naj ree Dios, në gra ree bén rusquiee, laa reeman rayal loj bajl lod caye'c azufre, bajl guin naj guialgüjt rarojp.

Jerusalén cüb

⁹ Dxel tijb guigajdx ree anjl bén ca' ree guigajdx ree cojp ni guidxa guigajdx ree guialzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel bén naj zi'c xi xiil Dios.

¹⁰ Abi' por Sprijt binë anjl guin naj guijc tijb guia' naroob, guijc tijb guia' ya. Ni balüuman naj Jerusalén, xciuda naroob Dios zidguiajtan xi xanyabaa Dios. ¹¹ Rulaan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdxe ni la Jaspe, nayni zi'c tijb vidr.

¹² Gadëd ro' ciuda guin naj tijb ze' naroob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaa ree bén Israel, tijb gaj lad port guin ca zi'c la tibcwaa gaj reeman. ¹³ Choon ree port guin naj niz lod rliejn gubijdx, abi' choon reen naj niz lod rëëz gubijdx, za choon ree port guin naj niz lad norte, za choonan naj niz lad sur. ¹⁴ Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bén naj zi'c xi xiil Dios.

Ni balüü Jesucrist loj San Juan 21:15xlixNi balüü Jesucrist loj San Juan 21:21

15 Anjl ni guneenë naj ca'man tijb var or din tia'beenëman ciuda guin con ree port guin con ze' guin.

16 Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan. **17** Dxel cwa'man midid ze' guin, abi' ze' guin najn gayojnbitap mejtr zi'c naj xmidid benguidxliuj zi'c bare'xh anjl guinan.

18 Ze' guin gojcnën guiaj ni la Jaspe, abi' ciuda guin najnën ganax or, zi'cgajczi naj vidr nayni.

19 Xguiaj cimiant ze' guin najcchaawnën gadx-agayaa ree guiaj zagdxe. Guiaj yaloj guin najcchaawnën con guiaj ni la Jaspe, guiaj barojp guin najcchaawnën guiaj ni la zafiro, guiaj bayon guin najcchaawnën guiaj ni la ágata, guiaj badajp guin najcchaawnën guiaj ni la esmeralda, **20** guiaj ni bagaay guin najcchaawnën guiaj ni la ónice, guiaj ni baxo'p guin najcchaawnën guiaj ni la cornalina, guiaj bagajdx guin najcchaawnën guiaj ni la crisólito, guiaj goc xhujn najcchaawnën con guiaj ni la berilo, guiaj goc gaa najcchaawnën guiaj ni la topacio, guiaj ni goc chii najcchaawnën guiaj ni la crisoprasa, guiaj ni goc chiptib najcchaawnën guiaj ni la jacinto, guiaj ni goc chiptio'p najcchaawnën guiaj ni la amatista. **21** Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najnë tijbgaj port. Abi' nejz naroob ni naa galay ciuda guin najn ganax or, zi'c tal naj tijb vidr ni rdëd biani grop xijch.

Ni balüü Jesucrist loj San Juan 21:22 1 Ni balüü Jesucrist loj San Juan 22:5

22 Ni'qui tijb yadoo ad baguiatan loj ciuda guin din dux Dad ree Dios bén ca' gra guialrniabee con bén naj zi'c xi xiilaman, laa reeman naj xyadoo ciuda guin. **23** Abi' loj ciuda guin ad rüjnt naguiejn gusni gubijdx ni'qui bëëw, din xbacha' Dios rusni ni abi' bén naj zi'c xi xiilaman laaman naj bajl ni. **24** Bén zëëd ree lod rent lod ren sa reeman loj bacha' guin, bén ma naj ree perdon. Abi' ree rey loj guidxliuj guie guidnë xguialza'cdxoон reeman loj ciuda guin. **25** Xport ciuda guin ad yu't dxej yaaw reen radxe, abi' ni ad zut guiaal. **26** Gra xguialza'cdxoон con gra xguialzagdxe ree bén zëëd lood rent lood ren, guidxin reen loj ciuda guin. **27** Per ad yu't dxej chu' ni dxuudx loj ciuda guin, ni'qui ree bén rüjn ni dxuudx ni'qui ree bén rusquiee, bén cazi ree laj loj xlibr guialnaban ni ca' bén naj zi'c xi xiil Dios, laaz reeman chu' loj ciuda guin.

22

1 Balüü tëë anjl guin lon tijb guiiw naya ni razaladx guialnaban, naynidxuj zi'c tijb guiaawajn. Ririi nijs guin lod za' xyagxhil Dios con bén naj zi'c xi xiilaman, **2** abi' zën galay loj nejz naroob ni naa galay ciuda guin. Galay nejz guin naa guiiw guin, abi' grop lad guiiw guin zojb yag ni runee guialnaban ni rtia chiptio'p loj ninejxh, gazobëëw ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan. **3** Achetri ni mal chu' ni, abi' Dios con bén naj zi'c xi xiilaman cwe loj xi yagxhil reeman guíaad ree xbejn reeman gap da't laa reeman respejt. **4** Abi' ni guguaaloj reeman Dios, bén ni ca ree lajman lucwaj. **5** Achetri

Ni balüü Jesucrist loj San Juan 22:6 li Ni balüü Jesucrist loj San Juan 22:13

guiaal chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblayaa con laaman.

Ma zidyob gui't Jesucrist

⁶ Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bén razaladx diidx loj ree bén rudëed xtiidxaman loj ree bejn, laaman guxhaal xi anjl din gulüüman bejn ree ni ma zidyob gac. ⁷ Dad Jesucrist rëb guial nayob gui'taman.

—Xiquilbaa ree bén ridxga' ni ca loj libr guie ni rugojn ni gac!

⁸ Naj Waj, baguian biguiejn tëen ni guin ree. Abi' chi gulox baguian biguiejn tëen ni guin ree, dxel bazuxiban par ga'p da'tan respejt anjl ni balüü ree ni guin lon. ⁹ Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompiiaril bén rudëed ree xtiidx Dios, në ree bén ridxga' ree ni ca loj libr guie. Zeel Dios gojp da't respejt.

¹⁰ Na tëeman lon:

—Ad guquie'chil diidx ni zëed ree loj libr guie, diidx ni rugojn ree ni gac, din ma zidyob gac reen.

¹¹ Gol basa'n ree ben mal con xni mal reeman, abi' ree bén naban nadxuudx zu naban reeman nadxuudx bal zian ruladx reeman. Per bén rüjn ree zi'c rayal gusnuu güün reeman zi'c rayal abi' ree bén naban zi'c rën Dios gusnuu guiban reeman zi'c rën Dios.

¹² Rëb Jesucrist:

—Gol badxe'guijc guial nayob guialan, abi' guidne'n ni rayal tijbgaj bejn bal gonin been ti-jbgajman. ¹³ Naj naj zi'c lejtr A con lejtr Z, lejtr

Ni balüü Jesucrist loj San Juan 22:14lii Ni balüü Jesucrist loj San Juan 22:19

ni rzulojnë ni rlioxnë tëë alfabeto, din tibzí naj rniabee diizd guia'xchej në par tiblayaa.

¹⁴ Xiquilbaa ree bén ni naj zi'c ree bén ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap tëë reeman derejch gaw reeman ni nejxh ni rtia loj yag runee guialnaban. ¹⁵ Abi' xijch ciuda guin yaya'n ree benguijdx, bén rüjn ree guialbidxaa, bén rüjn ree ni dxuudx con ree bén ad najt lacheel reeman, bén rugüjt ree bejn, bén ni rajp ree respejt ni nal-adx reeman naj dios, në ree bén ruladx cwëëguijc ni rusquiee rniece tëë reeman diidx rusquiee ree. ¹⁶—Naj Jesús ma guxhal da anjlan din gugojnman lëjt gra ree ni guie din guiëbidi laan loj gra ree bén rliladx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsildoo.

¹⁷ XSprijt Dios con biinxduüb ni gac lacheel bén naj zi'c xi xiil Dios rëb reeman:

—Guda.

Abi' bén riguiejn rniece reeman zian, rëb gajcaman:

—Guda.

Chutëëz bén re'c nijs, gol guda, abi' bén rën zajc guië'man nijs runee guialnaban lagajzi.

¹⁸ Gra ree bén riguiejn ree diidx ni zëëd loj libr guie ni gac, naj rni lojdi bal chu bén gucaa guijc ni zëëd loj libr guie, ziangajc zusro' Dios guialzi ni zëëd loj libr guie par laaman. ¹⁹ Ziangularc bal chu chiquied xhie diidx guijc ree diidx ni zëëd loj libr guie ni gac ziangularc chiquied Dios guijc ni rayalaman loj yag runee guialnaban ni ruza't libr

Ni balüü Jesucrist loj San Juan 22:20liiiNi balüü Jesucrist loj San Juan 22:21

²⁰ Bén ragbee guial diidxli naj gra ree ni guie, rëbaman:

—Walin, nayob guilan.

Zian gacan Dad Žesús, ¡Guda!

21 Dad Jesúś güünle' gradi. Amén.

Xtiidx Dios

New Testament in Zapotec, Santo Domingo Albarradas (MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
fb4ebcb8-e1f4-5bfc-b08c-f590e137d86d